

**Innarluutilinnik sullissisutut atorfillit ilinniagaqarnissaat, ilinniaqqittarnissaat pikkorissartarnissaallu pillugu nuna tamakkerlugu periusissiornermut iliuusissatullu pilersaarusiornermik Naalakkersuisut suliaqaqqullugit Inatsisartut aalajangiiffigisassaattut siunnersuut. Periusissiaq iliuusissatullu pilersaarut kingusinnerpaamik UKA2022 saqqummiunneqassaaq, iliuuserisassatullu siunniunneqartut qanoq nalilersorneqartarnissaat pillugu pilersaarummik amma imaqaqassalluni**

(Inatsisartuni ilaasortaqaq Sofia Geisler, Inuit Ataqatigiit)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerinnineq**

Naalakkersuisut Inatsisartuni ilaasortaqaq Sofia Geislerip (Inuit Ataqatigiit) aalajangiiffigisassatut siunnersuutaa qujassutigaaq.

Naalakkersuisut siunnersuuteqartoq isumaqatigaat innarluutilinnik suliaqaqarfimmi sulisuusut ilinniagaqarnissamik, ilinniaqqinnissamik aamma pikkorissarnissamik pisariaqartitsineri naammassineqartariaqartut. Naallu maanna isumaginninnermik suliaqaqarfiup iluani ilinniartitaanertigut suliniutinik ingerlatsisoqaraluartoq suli innarluutilinnut suliaqaqarfimmi ilinniarsimasunik sulisussanik amigaaqartoqarpoq.

Nunamut tamarmut atuuttumik periusissiaq iliuusissanullu pilersaarusiaq innarluutilinnut suliaqaqarfimmi sulisut ilinniartitaanerannut, ilinniaqqittarnerannut pikkorissartinneqartarnerannullu pingaaruteqarpoq. Tamatuma kingunerissavaa sulisuusut tamarmik, suliamik ilinniarsimasut aammalu ilinniarsimannngitsut, inunnik innarluutilinnik sullissisuusut periarfissaqalernissaat pikkorissartarnissamut piginnaanngorsartarnissamullu, taamalu qularnaarlugu inuit innarluuteqartut eqqortumik suliaqaqarfitsigut tapersorsorneqarlutillu sullinneqartarnissaat.

Nuna tamakkerlugu atuuttumik periusissiaq aamma iliuusissanut pilersaarusiaq ilinniartitaanermut, ilinniaqqittarnermut pikkorissartitsisarnernullu innarluutilinnik suliaqaqarfimmi innarluutilinnut iliuusissanut pilersaarusiarni nunamut tamarmut atuuttussami ilaassaaq. Tamatuma ilalersussavai innarluutilinnut tunngatillugu suliaqaqarfimmi nunamut tamarmut atuuttumik iliuusissanut pilersaarusiaq suliaqarnut assigiinngisitaartunut amerlasuunut sammiveqartoq, soorlu isumaginninnikkut, suliffeqarnikkut peqqissutsimullu tunngasutigut iliuusissat.

Taamaattumillu periusissiamik aamma iliuusissanut pilersaarusiarni pisariaqartitsineq Naalakkersuisut isumaqatigaat, taamaattumillu siunnersuut tapersorsorinnaallugu.

Naalakkersuisut fagitigut ilisimasallit assigiinngitsut akornanni siammasissumik ilaasortaavigineqartumik ataatsimiititaliamik pilersitsinissamut periarfissaqarput, inunnik immikkut innarluutilinnut tunngatillugu suliaqaqarfimmi ilisimasalinnik katersinissaq siunnerfigalugu, periusissialiornerup iliuusissanullu pilersaarusiornep ilusilersorneqarneranut atatillugu. Naalakkersuisut tamanna pissusissamisoortutut isigaat.

Pisariaqarporlu ilinniagartuutut AC-tut atorfilimmik ataatsimiititaliami sulinermut ilassusiinissaq.

Periusissiaq aamma iliuusissanut pilersaarussiaq aaqqissuussamik ilusilersorneqassapput malinnaavigalugillu malitseqartinneqarsinnaanngorlugit anguniakkat suliniutillu, ilinniartitaanertigut, ilinniaqqittarnikkut pikkorissartitsisarnertigullu innarluutilinnut suliassaqarfimmi sulisuusunik.

Tamannalu tunuliaqutaralugu Naalakkersuisut inassutigaat aalajangiiffigisassatut siunnersuutip akuersissutigineqarnissaa.